

## KARTA HEBREOWE'SX JÏI

*Dxusa' kwe'sxtxi we'wek txajx Nçxi'ka's kaahçxa*

<sup>1</sup> Dxusa' txãniitey kwe'sx yaçgawe'sxtxi maazkuëe uswa we'wek fxiyfxiyçxah txajx yuwee pta'sxsawe'sxtxi jxkaahçxa. <sup>2</sup> Sa' açxh naa nmeh ensu' Dxusa' kwe'sxtxik we'we txajx Nçxi'ka's kaahçxa. Dxusa' txajx Nçxi'ka's jxkaahçxak naa kiwe kïjkïhnawa jxuka vxit. Txã'wë yüuçxak Dxusa' txãatxi's jxuka Nçxi'k kuseteçxaçxáa nvxiht. <sup>3</sup> Txãa Nçxi'k íik Ney zhiçxkwe zmeena' kweethnisa yu', sa' Dxus ma'wëstate' le'çxkweçxáa yuhwa fxiysamée txãa íiçxáak yu'. Sa' txãa íiçxáa naa kiwe ma'k yuu nawa kïjkïhnawa jxuka ewçxáa kaafxi'ze'jna üsa' txajx we'weni yakhçxáa. Sa' txãa íiçxáa kwe'sx pkaltxi yaateçxa Dxus pukate kaçxku cielute.

*Dxus Nçxi'ka' angeleswe'sxte thaakwe walasa'*

<sup>4</sup> Dxus Nçxi'ka' angeleswe'sxte thaakwek walasa yu', txãasak Ney üsni yase jxpaga maa angeleswe'sxtewa thaakwe walasa. <sup>5</sup> Txã'wëte íiçxáak Dxusa' bagaçxte yuhwa angeleswe'sxtxi maa yuhtxwa na'jïna we'wemée:

Idxa' adx Nçxi'kgu,

Txãa pa'gath itxi yuuwa'ja's açxha' vxit jïme'.

Sa' txã'wëy maa angel yuhnawa na'wë we'weme':

Adxa' txajx Ney yu'nja,

Aça' txã' adx Nçxi'k yuuna jĩme'.

<sup>6</sup> Nawa Dxusa' txajx Nçxi'ka's nyafxçxah naa kiwete nuykĩhçxa', na'wëk we'we:

Dxus angeleswe'sx jxukaysa txã'sçxáana nwëese'jwa'j ji'phta' jĩnak jxkaah.

<sup>7</sup> Sa' angeleswe'sx fxi'zewa'ja's yu' na'wëçxáak we'we:

Angeleswe'sxa' wejxa na'wë vxyaawa'jsa vxitnisata',

Sa' Dxus jxkaahnitx selpiina ipx beesa na'wë vxyaana yuuwa'jsa vxitnisata' jĩ'k.

<sup>8</sup> Nawa Nçxi'k fxi'zewa'ja's we'weçxa yu' na'jĩ'k: Dxus, iidx jxkaahna ũswa'ja' bagaçxtewa nes yuuna,

Idxa' ew yuuçxáa jxkaahna ũswa'jsag.

<sup>9</sup> Sa' ewmeesa yu'sa' jxpa'gamée, ewsa yuuçxá'sgu pakwe.

Txãa pa'gak iidx Dxusa' iidx wët fxi'zewa'ja's iiméh wala pees,

Naa kiwete iidx nwe'sxte jxthaakwe jĩ'k.

<sup>10</sup> Vxite ajkhë' na'jĩ'k Dxus Nçxi'ka's we'weçxa':

Idxgu kiwe's pheu'j nyafxte,

Sa' cieluwa iidx kuseju vxitnisata'.

<sup>11</sup> Nawa txã'wësa' pçuutxna, naapkaçxha' idxa' bagaçxtewa nes yuune'ga.

Kĩjkĩhwa jxuka ropa na'wëçxáa iisxixna.

<sup>12</sup> Aça' jxuka yu'pthehni yuutxna.

Nawa idx yu' bagaçxtewa txã'wëesa nes yuune'ga.

Iidx iłxi fxi'zeni' bagaçxte yuhwa pçumeena jĩ'k.

<sup>13</sup> Nawa Dxusa' maa angeleswe'sx yuhtxwa txã'wë yu' na'jĩna we'weme' bagaçxteçxáa yuhwa:

Adx pukate paçu ju'gte mkaaçx,  
 Idxna açesa maatxwa jxuka idxçxaçxáana  
 nwēese'jwa'ja's vxitna jxā'phkaçx jīme'.  
 14 Jxukay angeleswe'sxa' kwe'sx na'wē  
 kakwe ji'phmeesa naa kiwete maaçxah ewte  
 neeyūuwa'jsa ūstxna txāawe'sxtxi pu'çxya'  
 kaahnisaçxáata'.

## 2

*Ewte neeyūuwa'ja's jxpa'yajkxmée yu' yu-  
 uwa'jme'*

1 Txāa pa'ga wala jxpa'yakxwa'j ji'ptha'w,  
 na'wē Dxus Nçxi'k yuu kwe'sxtxi we'wete  
 yuwe ewsa's wēse'tha'w txāajū txuteeya'mée.  
 2 Dxus yuwe's angeleswe'sxçxáa pta'sxni  
 yuhwa ĩsxiini yuumée kxteyku yuu. Txāa  
 pa'gaiçxáatx nwēese'jmée pkalte wetesawe'sxa'  
 kastigāyni yuu txāawe'sx āhmée yūupa'ga.  
 3 Txāaçxáa yuhwa kxteyku yuu, aça' kwe'sx  
 ewte neeyūuwa'j txakwe walasa's Dxus Nçxi'k  
 Kristo txajx yuweju yuuk pta'sx txā'sa'  
 jxpa'yakxmeeçxa', ¿ma'wē Dxus kastigo  
 seena'sajū iyukxtha'w? Aça' Kristo pta'sxni's  
 nyafxte wēse'jsawe'sxa' kwe'sxtxitx pta'sx, isasa  
 yuja' jīna. 4 Txāawe'sxçxáa isasa yuja' jīmeeta',  
 Dxus yuuk isasa yuhna sūhna jiyukahn kim  
 yuhwa ājanimeesa's kaavxya'ja'j. Sa' Dxus  
 Espiritu pu'çxte kīhte yuhwa sxiigmée selpiina  
 fxi'zewa'jtx ūsku teeçxsa na'wēçxah, txajx ūs  
 wēeni yu's jxuka.

*Jesukristo' kwe'sx yakh pxakhsa na'wēk yuu*

<sup>5</sup> Na'wě Kristoçxaçxá's nwěese'jwa'j en pa'jana jĩ'tha'w txã ente jxkaahwa'ja's angeleswe'sxtxi nvxihtme' Dxusa'. <sup>6</sup> Txã'wě meek yu' txajiiçxáak na'jĩna teeçx ajkhě pta'sxi' Dxus librute:

Nasa' çma'wěsana açga txã'sa' peeygãja'?

Nasa pçuwa'jsaçxá's çkĩjxa'ga txakwe wala pa'pçxuna yaaki'?

<sup>7</sup> Nasa's maz en yu' angeleswe'sxte ãhmeekwesa na'wěg nvxiht,

Nawa jxthaakwe walasa yuuwa'j vxitçxag nvxiht,

Txã'wě yũuçxa iidx vxitnitxi' txãaçxaçxáa jxkaajxa' ãjawa'ja's ũsgu.

<sup>8</sup> Kĩhwa jxuka txãaçxaçxá's nwěese'jwa'ja's vxitgu jĩ'k.

Dxusa' txã'wě jxuka txãaçxaçxá's nwěese'jwa'ja's vxit yã'jçxa', kĩh yuhwa nwěese'jwa'jsamée yu' nvxihtme'. Txã'wětewa ãçxpkaçx txãaçxaçxá's kĩhwa jxuka nwěese'jni yu's iuymeetha'w. <sup>9</sup> Na'wě maz en yu'

angeleswe'sxte ãhmeekwesa vxitku txã' Jesusa' txã'snak Dxusa' kwe'sx jxukaysa pa'gate uuwa'jsa vxit. Nawa ãçxha' Dxus pukate u'pa', txãaçxaçxáa jxkaahwa'jsa yuuçxa txã'wě pxthaa yuuçxa uupa'ga.

<sup>10</sup> Kĩjkĩhnawa jxuka vxit-sa Dxusku txajx luuçx yuuwa'jsa yuutxi' jxuka nwe'weçxa txajx tasxte nuypa'jya' Jesukristo's pxthaa yuuçxa uuwa'j vxit, kĩhte yuhwa sxiigmée nwe'wesa yuukahn. <sup>11</sup> Txã'wě pkaltxi peltunãynisa vxite' pkaltxi peltunãysa txãa yakh e'zsa' teeçx Neytewe'sxçxaçxáata' txãa Neya' Dxusa'. Txã'wě teeçx Neytewe'sxçxáa ne'tka'w, txãa pa'gak Dxus

Nçxi'ka' kwe'sxtxi's thaamemée Adx nyakh jīna we'we'. <sup>12</sup> Txã'snak Dxus librute na'jī':

Idx ma'wēsatewa adx nyakhwe'sxtxi pta'sxi'nja, Sa' adx nyakhwe'sx ksxavxyte idxa's weçxana tuuthe'je'nja jī'k.

<sup>13</sup> Sa' vxite ajkhēwa na'wēk we'we':

Adxa' Dxusçxáana yajkxna fxi'ze'nja. Sa' ki'kin we'weçxa':

Dxus ũsni luuçx ayte ũsta' txãa yakh ayte ũsthu jī'k.

<sup>14</sup> Nasawa pxakhsa jīnisa' maazkuēçxawa kxazíi teeçx ney kakwe petx ee jxpa'gaçxa yuuçxáatx pxakhsa yu', txãa pa'gak Jesuswa pxakhsa yuuya' nasaa kakwe's jxpa'ga uuya' ājaya'. Txã'wē yūuçxak kluuste uuçxa uuwa'j vxit-sa's knay. Txã'wē nasatx uuwa'j vxit-sa' eçxthē'kh yu'. <sup>15</sup> Txã'wē yūuçxak Jesusa' jxukaysatx nwe'we bagaçxtewa uuwa'ja's ũukhna yuuçxáa fxi'zenijū. <sup>16</sup> Txã' angeleswe'sxtxi pu'çxya' kīhme', wejxwa nasa Abraham jī'jtxku pu'çxya' kīh. <sup>17</sup> Txã'wē nasatx pu'çxya' ājaya'k kwe'sx na'wēsa yuu kīhtewa jxuka. Txãasak nyakh na'wē yuuna pa'jçxa kwe'sxtxi peeygāawa'ja's jī'phuçxa pkalsawe'sx pa'gate Dxus tasxte we'wewa'jsa yuu. Sa' nasaa pkaltxi jxuka peltunāyya'k pxthaa yuuçxa uuwa'j jī'phuna ũsu'. <sup>18</sup> Txã'wē nasaa kakwe's jxpa'gaçxak pkalte kwe'sx çxhāçxhamée fxi'zeni's jxuka jiyu. Txãasa āçxha' pkalte çxhāçxhamée fxi'zesatxi's kīhte yuhwa sxiigmée nwe'weya' ājawa'jsa'.

### 3

#### *Jesusçxáa Moieste thaakwesa'*

<sup>1</sup> Yakhthě'jwe'sx i'kwe'sxa' Dxus pa'yanisa i'kwe yuu txāa jīi yuuwa'jsa, txāa pa'ga wala ew mjiyuwe Kristo Jesusa's. Txā' Dxus kaahnisa', pkalsawe'sx pa'gate Dxus tasxte we'wewa'jsa, sa' Dxus yakh kwe'sx fxi'zewa'ja's pta'sxsa'. <sup>2</sup> Jesusa' kīhtewa jxuka kxtey yuuk ma'wě yūuwa'ja's ne' Dxus jxkaah txā'sa' jxuka. Moiseswa ma'wěga Dxus luuçxtxi jxpe'jwa'ja's jxuka kxtey yuu, txā'wěyku Jesuswa kxtey yuu. <sup>3</sup> Nawa Jesusçxáa Moieste thaakwe jxtuhthesa', ma'wěga yat namuçxáa jxtuhthe yu' aça' yatte selpiisáa yu' jxtuhthe meek yu', txā'wěy Jesusçxáa jxtuhthesa'. <sup>4</sup> Yata's kimçxáawa txahte yujk yat yuuna pa'ja', nawa namu yu' Dxusa'. <sup>5</sup> Moisesa' selpiisaaçxáaçxawa txā'wěk kīhte yuhwa peejxmée jxuka kxtey yuu Dxus luuçxtxi jxpe'jna, nawa txajx selpiini yu' e'su Dxus kīh yūuya'watewa txāatx kaajiyu'jsaçxáak yu'. <sup>6</sup> Naapkaçxha' Kristo' selpiisamée Dxus Nçxi'k yuuk yu', txāasa Dxus luuçxa' kwe'sxtha'w txāatx kīhte yuhwa peejxmée jxpe'jwa'jsa', kwe'sx yuu uu entepkaçx txutemée txā's yuuçxáa weçxana fxi'zete yu'.

#### *Dxus luuçx, Dxus tasxte jxkaasena ũswa'j*

<sup>7</sup> Txāa pa'ga txāa yakhçxáa fxi'zewa'ja's na'wěk pta'sxi' Dxus Espiritu':

Ãçxh Dxus we'weni's wěse'jyã'jçxa',

<sup>8</sup> I'kwe'sx ũuste wa'l yaakxnuwe. I'kwe'sx yaçgawe'sxwa na'wětx wa'lna ũsu' txā'wě yūunuwe.

Txã'wě wa'lçxa txãawe'sxa' Dxusa's kvxissatx  
na'wě yuu nasa u'pnimée kiwete.

<sup>9</sup> I'kwe'sx yaçgawe'sxa' kxtee ũsçxa',  
Txakwe kuarenta anxupkaçx txãawe'sxtxi adx  
kĩjkĩhtewa ew yũuna pu'çxni's uyçxawa,  
Adxa's wa'ltxi.

<sup>10</sup> Txãa pa'gath txãa nasa yakh wět fxi'zey'a'  
ājameeçxa na'jĩna we'we:

Adx kaapiya'jni's wa'lçxa, txãawe'sx ũuste jx-  
pubanaçxáatx fxi'ze'.

<sup>11</sup> Aça' txã'wě yũupa'ga, txãawe'sxa' adx yakh  
jxkaasena ũswa'the u'kameetxna jĩnath  
juräy jĩ'k.

<sup>12</sup> Txãa pa'ga, yakthē'jwe'sx, wala  
mpa'yajkxwe, txã'wě Dxus we'weni' weh yuhwa  
isameesana sũhna ewmée yajkxçxa Dxus  
ĩtxisa tasxu txuteeya'mée. <sup>13</sup> Txã'wě yũumée,  
jweeíçxáa çxhãçxha yaakxwa'ja's een isa  
puutx pu'çxna mfxi'zewe, kxah i'kwe'sxtxi' maa  
yuhtxwa pkala' kaypuba'jmeena, aça' i'kwe'sx  
ũuste ewmée yaakxwa'ja's ji'phumeene'kwe.

<sup>14</sup> Nyafxíiwa ma'wětka'w Kristo yakh jxpubamée  
fxi'ze txã'wěesa nmeh entepkaçx fxi'zeçxa', txãa  
yakh ũswa'ja's ji'phu'nja'w.

<sup>15</sup> Txã'wě wa'lkahmen na'wěk we'we':  
Açxh Dxus we'weni's wěse'jyã'jçxa',  
I'kwe'sx ũuste wa'l yaakxnuwe. I'kwe'sx  
yaçgawe'sxwa na'wěttx wa'lna ũsu' txã'wě  
yũunuwe jĩ'k.

<sup>16</sup> ¿Kimta txã'wě Dxus yuwe's wěse'jçxawa  
e'su yã'ja' wa'lna ũsu'? Egipto kiwejũ  
Moises kutxi'kh txãawe'sx jxukaysatx txã'wě  
yũu. <sup>17</sup> Dxusa' ¿kim yakhga kuarenta

anxupkaçx pxũuskwete fxi'zena ũsu'? Pkalte wetepa'ga nasa u'pnimée kiwete uutx txãawe'sx yakhku txã'wē pxũuskwete fxi'zena ũsu'. <sup>18</sup> Dxusa' ħkimtxiga txã'wē adx yakh jxkaasena ũsya' u'kameetxna jīna we'we? Nwēese'jsameetxku txã'jīna we'we. <sup>19</sup> Dxus we'weni's nwēese'jmeeçxa', u'kaya' ājameeta' txã'sa' āçxha' jiyutha'w.

## 4

<sup>1</sup> Txāa pa'ga wala jxpa'yakiga. Txā'wēme', i'kwe'sxwa maaíi yu' ivxiituwá'kwe Dxus yakh jxkaasena ũswa'the pa'jwa'ja's ji'phçxawa. <sup>2</sup> Txāawe'sxtxiwa ma'wēga jxkaasena ũswa'the pa'jwa'ja's pta'sxni yuu, txā'wēy kwe'sxtxiwa pta'sxnik yuu Dxus yuwe ewte nvxiitwa'ja's. Nawa txāawe'sxtxi' txāa pta'sxni' selpiime', Dxus yuwe' isa kxtey yuuwa'jsana sūhna ũsuh jxuka nwēese'jmeeta' naa pa'ga. <sup>3</sup> Dxus we'weçxa: Adx yakh jxkaasena ũswa'the u'kameetxna jīna jurāyku. Nawa kwe'sx yu' pejka u'kawa'jsatha'w, Dxus yuwe' isa yuhna sūhnatha'w jxpa'gaçxa nwēese'j naa pa'ga. Na'wē adx yakh jxkaasena ũswa'j jīna we'wek txāa yu' nyafxiitey naa kiwe's vxitna jxā'jçxa jxkaasek, sa' āçxpa'jwa jxkaasena ũsa' kxte u'kawa'ja's we'weçxak txā'jī'. <sup>4</sup> Txajx mjīia's vxitna jxā'jçxa jxkaaseni's Dxus librute na'jīnak we'we':

Dxusa' txajx mjīia's jxuka jxā'jçxa', siete ensa's jxkaasek jī'k.

<sup>5</sup> Sa' kxte txajx jxkaaseni's we'weçxak:

Adx yakh jxkaaseya' u'kaya' ājameetxna jī'.



6 Makwe txã'wētewa, maaíi yu' kxtee jxkaasena ũswa'the u'katxna. Nyafxiiwe'sxa' ewte neeyũuwa'ja's pta'sxte wēse'jçxawa, Dxusa's nwēese'jmeeçxa jxkaasena ũswa'the u'kameeta'. 7 Txã'wē yũuni en skhēwniijũ wala txaçxtek Dxusa' Davxida's na'jĩna kwe'we'j:

Ãçxh Dxus we'weni's wēse'jyã'jçxa',

Wa'lna nwēese'jmée yu' yuunuwe jĩ'k.

Txãa yu' ãçxh naa ensuwe'sxwa txã'wēy yũuwe'sxtek txã'jĩ. 8 Jxkaasewa'j jĩna we'we'k txãa jxkaasewa'ja' Joswé entewe'sxwaça', Dxusa' e'su txaçxte ki' we'wewa'jmeene' yu' ãçxh jĩna.

9 Txãa pa'ga jxkaasewa'j thaakwe ewsa nee ũsíçxá' Dxusa's nwēese'jsawe'sx jĩi. 10 Txãa pa'gatey Dxus yakh jxkaasewa'the u'kasa' txãawe'sx mjĩiniijũ jxukatek jxkaase', Dxuswa ma'wēga txajx mjĩini's jxã'jçxa jxukate jxkaase txã'wēy.

11 Txãasa Dxus yakh jxkaasewa'the u'kaya' pa'pçxuwa'j ji'ptha'w, Dxus we'weni's nwēese'jmeeta' txãawe'sx na'wē yũumée.

12 Txã'wēme', Dxus we'weni' itxisa', kĩhtewa jxuka seelpisa. Dxus we'weni' kçxilx pdxi'p seena' zeksate jxthaakwe zeksa', txãasak ũus dxiite kĩh pkal ji'phtewa jxuka ãate kpa-jkxwe'we'. Sa' ũusteçxáa yaakxni kĩh yuh-nawa paaçte nvxiitu'çme'. 13 Dxus vxitnisa' kĩh yuhwa txajx dxi'pte paaçte unymeete yu' neeyũumeetxna. Kĩjkĩhwa jxuka ãateçxaçxáa ũsta' kwe'sxtxi kastigãywa'jsa ũsa' txajx dxi'pte.

*Dxus tasxte pkalsawe'sx ju'gu we'we pu'çxsa'  
Jesusa'*

14 Dxus Nçxi'k Jesus txã'wẽ Dxus tasxte kwe'sx pkalsawe'sx ju'gu we'we pu'çxwa'jsa cielute u'kak, txãa pa'ga txajx tasxuh txutemée fxi'zega. 15 Txãa pa'gatey cielute kwe'sx ju'gu yuusa' txãa yu' pkalte yu' wetemeeçxawa, pkalte kwe'sx çxhãçxhamée fxi'zeni yu'sa' jxuka jiyuk, txãasa kwe'sx ãhmeeekwesatx jxuka peeygãhna pu'çxwa'jsa'. 16 Txãa pa'ga Dxus tasxte ùukhmée utxaaga, Dxus peeygãani's ji'phuçxa kwe'sx thëyte fxi'zenijũ nwe'weni yuuya' kĩh entewa.

## 5

1 Pkalsawe'sx ju'gu we'we pu'çxwa'jsa txhitxhçxa naa kiwete nvxiitnisa' txãa íçxáa pkalpa'ga tajkx ikhçxa Dxus altalte kabwa'jsa'.

2 Pkalsawe'sx ju'gu we'we pu'çxsa' txãa íiwa pkalte nxuste fxi'zesaçxa', nxuste fxi'zeni ma'wëtewa jxuka jiia'. Txãasa jiimeekwesa vxituna fxi'zesatx wala peeygãhna ju'gu yuuwa'jsa'. 3 Sa' txãa íiwa ãhmeeekwe pkalsaçxa', peekx pkalpa'gawa tajkx ikhçxa Dxus altalte kabwa'j ji'phu'k, vxitesa pa'gatewa txã'wëy.

4 Pkalsawe'sx ju'gu we'we pu'çxwa'jsa' nasaa pwe'sxçxáa yajkxçxa ki'pnisa yu'çmeeta'. Txãawe'sxtxi' Dxusku txhitxhçxa nvxiitu', Aaronwa ma'wëga Dxus txhitxhnisa yuu txã'wëy. 5 Aça' Kristowa txã'wëy yũunisaíçxáak yuu. Txã' peekxçxáa yu' pkalsawe'sx ju'gu Dxus tasxte we'wesa yuume'. Txã'sa' Dxusku txhitxhçxa nvxiht. Txajíik Dxus librutewa na'jĩ': Dxus we'weçxa':

Idxa' adx Nçxi'kgu,

Txãa pa'gath ãtxi yuuwa'ja's ãçxa' ãs jãnak we'we'.

<sup>6</sup> Sa' vxite ajkhẽwa Dxus librute na'jãnak we'weni yuu:

Idxa' pkalsawe'sx ju'gu Dxus tasxte we'we pu'çxwa'jsag bagaçxtewa,

Melkisedekwa ma'wẽga yuu txã'wẽysa jã'k.

<sup>7</sup> Kristo' naa kiwete ãsçxa', txajx uuwa'j en jxuka utxaaçte', Dxus nwe'weya' ãjawa'jsa dxi'pte wala pxthaa sus neewe'wek ã'nena, aç'a' Dxusa' wẽse'kh txajx pxthaa we'weni's.

<sup>8</sup> Kristo' makwe Dxus Nçxi'kçxawa, iiméh wala pxthaa yuuwa'ja's jiyuçxa, nwẽese'jwa'ja'swa piyak. <sup>9</sup> Txã'wẽ kãh pxthaa yuunisatewa jxuka jiyuna jxã'jçxak, bagaçxtewa nwe'wena nes yu-uwa'jsa yuuna pa'j jxukaysa nwẽese'jsa yuutxi's.

<sup>10</sup> Txã'wẽ yũunijũk Dxusa' pkalsawe'sx ju'gu we'we pu'çxwa'jsa vxit, Melkisedek na'wẽysa.

### *Dxusa's jiiçxa txajũ txuteete' ãukhũukhsa'*

<sup>11</sup> Na'wẽ pta'sxi'th txã'sa' wala we'wewa'j ji'phiiçxáath, nawa i'kwe'sxa' jiyuya' ãja'çmeei'kwe, aç'a' wala thẽya' ew pta'sx wẽete yu'. <sup>12</sup> Dxusa's jiyuni txakwe txaçxte', i'kwe'sx yuu kaapiya'jsa yuupkaçxte, nee peejiçxáa i'kwe Dxus kaapiya'jni thẽymeekwesa's ki' peena ew pta'sxwa'j. I'kwe'sxa' luuçx na'wẽysaçxáa i'kwe, kãh ã'a'swa ã'wepkaçxte, luuçx ã'ni leçxi'sçxáa i'kwe ã'we'. <sup>13</sup> Txã'wẽ leçxiçxá's ã'sa' luuçx le'çxkwe kçxu'çxu'jnisa na'wẽsaçxáata', txãasatx Dxus yakh ew fxi'zewa'j yu'sa' jiyu'çmée. <sup>14</sup> Nawa thẽ'jsa yã'ja'

thě'jsa ũ'nisatx jxpa'gawa'ja', kīh ewsatxna vxite'  
kīh ewmeesatxna nawa txãatx jxuka jiyuya'.

## 6

<sup>1</sup> Txãa pa'ga Kristo kaapiya'jni nyafxte  
thěymeekwesatx pta'sxtha'w txãa yakhçxáa  
fxi'zemée, jweeiçxáa wala piyana u'jwa'j  
ji'ptha'w, sxiigna fxi'zeya'mée. Nyafxte  
kaapiya'jnisa yakhçxáa yu' fxi'zemeeyuuga. Txã'  
naata': pkaltxi nvxihtçxa Dxus tasxte sxawedni,  
Dxusa' ũsyuhna sūhna ũusuh jxuka yaakxni,  
<sup>2</sup> yu'te ya'bautisāyni, Dxusna selpiwa'jsatx  
txhitxhçxa Dxus kusete neewe'weni, ki' ĩtxi  
yuuwa'ja's kaapiya'jni, Dxus kastigo iiméh  
seena'te pa'jwa'ja's pta'sxni, txãa nyafxte  
kaapiya'jnisata'. <sup>3</sup> Dxus pu'çxte' jweeiçxáa  
piyana u'jwe'nja'w.

<sup>4</sup> Txã'wěme', maawa Dxus yakh fxi'zewa'ja's  
ew jiisa, Dxus peesku ewte neeyūuwa'ja's  
txã'snawa ew jiisa, Dxus Espiritu'swa ũuste  
jxpa'gasa, <sup>5</sup> txã'wěy Dxus yuwe ewsatewa jiisa,  
nmeħ ente' Kristoçxaçxáa jxkaahwa'ja'swa  
jiisa, <sup>6</sup> txã'wě kīhtewa ew jiisa Dxus  
tasxuh txutesaatxi' peena kaasxwedu'j wēete  
ya'aja'çme'. Txãa pa'gatey txãawe'sxa' Dxus  
Nçxi'ka's ew jiiçxawa ahçena weeçxçxa  
kluuskhě ki' ki'psa na'wě yuusaata' naa pa'gak  
ya'aja'çmée. <sup>7</sup> Txãawe'sxtxi' na'wětha'w  
kaaja'da'ja': Kiwe mjīinisa' nus pa'jni yu'a's  
jxuka çxazxate', uuthasx ewsak kaseje', Dxus  
pu'çxte mjīisawe'sx jīi. <sup>8</sup> Nawa ewsa kasehmée  
jxūth kīhte yuhwa seelpimeesaçxáa buçxate',  
kiwe txã'wěsa's nmeħte' thegnimée yuuna.

Txã'wëy maawa Dxusa's jiiçxa ki' txutesá' kïhte yuhwa seelpimée, ivxiituni yuutxna.

*Dxusa' kxtey yuuna sũhniisak çxhãçxa kaafxì'ze'je'*

<sup>9</sup> Nawa i'kwe'sx yu' txã'wë yuumée, Dxus nwe'wenijüyã'ja' jweeíçxáa wala ew yũuna fxi'zene'kwe sũju'th. <sup>10</sup> I'kwe'sx txã'wë ew yũuna yakthê'jwe'sxtxi peeygãhna pu'çxna ãate kaavxya'ja'jna ãçxpkaçx txã'wë ew yũuna nes txã'wë i'kwe, naa pa'ga Dxusa' i'kwe'sx ew yũuni's peçxkanameena. <sup>11</sup> Nawa adxa' nmeh entepkaçx txã'wë kaavxya'ja'jna pa'pçxuna nesthu yũu jxthãasu' teeçxsa na'wëçxah. Txã'wë yũuçxa', kxulmée pa'pçxusa yuune'kwe. <sup>12</sup> Wa'lwa'j yu'sa' le'çxkwe yuhwa ji'phunuwe, yaçgaywe'sxwa ma'wëta Dxusa' kxtey yuuna sũhna ũusuh jxuka yajkxçxa Dxus peesni's jxpa'ga txã'wëy myũuwe.

<sup>13</sup> Miiyajkxwe, Dxusa' Abrahana's pu'çxwa'ja's puutx we'weçxa' peekx yase'síiçxáa kxsusna jurãyku, vxite txãate jxthaakwesa yu' meek yu' naa pa'ga. <sup>14</sup> Sa' na'jik: Isa, iidx ji'jtx wala nuypehnana idxa's pu'çxwa'jsath jĩnak jurãy. <sup>15</sup> Aça' Abrahana' wa'lmée ũythasçxa', jxpa'gak Dxus ma'wëne' yũuya' neeyũu txã'sa' jxuka. <sup>16</sup> Aça' nasawa juraĩççxa', txãawe'sxte jxthaakwe walasa's kxsusnatx juraĩ', kxtey yu'nja jĩna. Txã'wë yũute', ĩsxiimée kxtey yuuna sũhwa'jçxáak ya'ji'phu'. <sup>17</sup> Txãa pa'gak Dxuswa txã'wëy jurãy: Adx puutx we'weni's kxtey yu'nja jĩna. Dxusa' txajx puutx we'weni's le'çxkweçxáa yuhwa yu'pthehmée kxtey yuuya'k

ũsu', aça' txã'sna jxpa'gawa'jsa' kxtey yuuyu-  
 juna sũhnaçxáa ũskahnku txã'wẽ yũu. <sup>18</sup> Dxus  
 jurãyni' e'z jwedtxi yu': Kxtey yu'nja jĩna  
 we'weni vxite' txajx yase's kxsusni. Txãa pa'ga  
 txajx puutx we'weni' yu'pthehmeetxna. Kx-  
 ahtha'w Dxusa' txajx puutx we'weni's kxtey yu-  
 uyujuna Dxusna pakwesaatxi's sũhna çxhãçxha  
 yaakxwa'ja's ji'phu'. <sup>19</sup> Dxusa' txajx puutx  
 we'weni's kxtey yuuna sũhnisak kwe'sxtxi's jx-  
 pubamée çxhãçxha kaafxiz'e'je', txãa pa'gatey  
 kwe'sxa' cielute ũssa Dxus puutx we'weni  
 kxtey yuuwa'ja's jiiçxatha'w ũythasu' naa pa'ga.  
<sup>20</sup> Jesusa' cielute Dxus ũsnitek u'ka, Dxus tasxte  
 pkalsawe'sx ju'gu we'we pu'çxçxa kwe'sxtxi kx-  
 tee ka'ga'jya'. Txã' Melkisedek na'wẽsak yu'.

## 7

### *Jesusa' Melkisedek na'wẽsa'*

<sup>1</sup> Naa Melkisedekha' Salem çxhabte jxkaahsak  
 yu', nawa txãaíçxáa pkalsawe'sx ju'gu we'we  
 pu'çxsak yu'. Aça' teeçx ente' Abrahana'  
 gweçxate puiina ũççxa', naa kiwete jxkaahsa  
 ewmeesatx knayçxa sxawedna pa'jaçte',  
 Melkisedekha' pu'thegya' kasehçxa bedicion  
 akhte', <sup>2</sup> Abrahana' diesmo dukhku makwene'  
 dukhwa'j ji'phu' txãa yu's jxuka. (Hebreo  
 yuwete' Melkisedek jĩnisa' Ew Jxkaahsa  
 jĩnisa', aça' Salem jĩnisa' wět fxi'zeni jĩnisak  
 yu'. Txãasa Melkisedekha' wět fxi'zenite ew  
 jxkaahsa' jĩnisa'.) <sup>3</sup> Sa' txajx ney txajx njĩ'j txajx  
 yaçgawe'sx txãatxi's ya'jiyu'çme', txajx upxhni  
 en txajx uuni txã'wẽsaçxa yuhtxwa. Txãasa

Dxus Nçxi'k pkalsawe'sx ju'gu we'we pu'çxna nes yuusa na'wěysak yu' Melkisedekha'.

<sup>4</sup> Āçxha' ew mjiyuwe: Melkisedekha' iiméh wala jxtuhthesa yu'k. Txajíik kwe'sx yaçgawe'sx Abraham yuhwa diesmo's txã'sna dukh gweçxate puiiçxa txajx jĩitxi's ki' kusa'jni's. <sup>5</sup> Moises leya' naasáa Levxi ji'j yuuçxáatxku jxkaaja' txãawe'sx nwe'sx diesmotx jxpa'gawa'jsa. <sup>6</sup> Txã'wětewa, Melkisedekha' Levxi ji'jmeeçxawa Abraham dukhni diesmo's jxpa'gak, sa' Abrahamana' makwe Dxus txhitxhnisatewa Melkisedekha' bedekĩyku. <sup>7</sup> Bedekĩysa' bedekĩynisate jxthaakwe walasa' txã'sa' txã'wěme' jĩya' ājameetxna kim yuhwa. <sup>8</sup> Āçxh naa ensu kwe'sx pwe'sx dukhni diesmo's jxpa'gasa' nasa uuwa'jsaçxáata'. Nawa Dxus librate Melkisedekha's we'weçxa': Bagaçxte yuhwa uumée ĩtxi ũssa jĩna we'weç na'wěk pta'sxi': <sup>9</sup> Levxi ji'jwe'sx jxukaysa na'wě diesmo's jxpa'ga'tx txãawe'sxwa diesmo's dukhsatx yuu Melkisedekna. Ew jiyute yu', txãawe'sx jxukaysa pa'gate Abrahamku dukh. <sup>10</sup> Txã'wěk yuu jĩkahnii Abrahamana' Melkisedek yakh puutx uyçxa diesmo's dukheçte', Levxi ji'j yuuwa'jsa' Abraham kakweju kasehmeytxi yu'.

<sup>11</sup> Ley nvxiitnisa Aaron ji'j levxiwe'sxçxáa txã'wě nasa pkalsatx Dxus tasxte kuutxa'jya' ājawaça', vxite kaahwa'j peejmeene' yu', Melkisedekwa ma'wěga Aaron ji'thewe'sxmée yu' txã'wěysa. <sup>12</sup> Txã'wě pkalsawe'sx ju'gu we'we pu'çxsa levxiwe'sxtxi kutxi'jçxa', leynawa phu'se'jwa'ja'. <sup>13</sup> Na'wě vxite kaahwa'ja's we'we'k txã' kwe'sxtxi jxpe'jsa Jesukristo's we'weçxak

txã'jĩ'. Jesukristo' Israel nwe'sxçxawa, Aaron ji'thewe'sx meek yu'. <sup>14</sup> Judá ji'thewe'sxku yu' txã'sa' ew jiitha'w. Aça' Judá ji'thewe'sxa' kim yuhwa pkalsawe'sx ju'gu we'we pu'çxwa'ja's ji'phmeeta'. Txajíik Moisesa' txã'wẽ yũuwa'ja's Judá ji'thewe'sxtxi' maa yuhtxwa kxsusmée.

<sup>15</sup> AYTEK isa ew ya'jiyu' leya'swa phu'se'jwa'ja's. Txã'wẽ phu'se'khaníi pkalsawe'sx ju'gu we'we pu'çxwa'jsa' ley nvxiitnisamée, Melkisedek na'wēsak yu'. <sup>16</sup> Txã' ley txhitxhçxa nvxiitnisamée, bagaçxteçxáa yuhwa pçumée ãtxi fxi'zewa'jsak yu'. <sup>17</sup> Txajíik Jesusa's we'weçxa na'jĩ Dxusa':

Idxa' bagaçxtewa pkalsawe'sx ju'gu we'we pu'çxna nes yuune'ga,  
Melkisedek na'wēsa jĩ'k.

<sup>18-19</sup> Txajíik Moises leya' nasa pkalsatx Dxus tasxte kuutxa'jya' ãjamée ma'wēçxáa yuhwa, txãa pa'gak txãa leya's phu'se'jni yuu. Aça' ãçxha' txãa leyte jxthaakwe ewsa ji'ptha'w txãa yakha' Dxus tasxte utxaaya' ãja'tha'w.

<sup>20</sup> Dxus tasxte kuutxa'jya' ãjawa'ja's Dxusa' nvxiituççxa' juraĩmée yu' nvxihtme'.

<sup>21</sup> Dxus tasxte kuutxa'jya' ãjawa'jsa jĩnisa nyafxiiwe'sxtxi' Dxusa' juraĩmeek nvxiht. Nawa Jesusa's txã'wẽ yuuwa'jsa nvxiituççxa', jurãyçxak nvxiht. Txajíik Dxus librute na'jĩna we'we':

Idxa' bagaçxtewa pkalsawe'sx ju'gu we'we pu'çxna nes yuune'ga jĩnak Dxusa' txajx we'weni's jurãy na' yu'pthehmeena.

<sup>22</sup> Txãa pa'ga Jesusa' jxthaakwe ew puutx we'weçxa nvxiitnisa'. <sup>23</sup> Pkalsawe'sx ju'gu



we'we pu'çxsa nyafxiiwe'sxa' wala kuh yu'tx, txãa pa'gatey uunatx u'jwe'. Txãasatx teeçxçxáa yu' u'pxa' aja'çmée. <sup>24</sup> Nawa Jesusa' uuwa'jsame', txãasa pkalsawe'sx ju'gu we'we pu'çxna ũswa'ja's vxitetx nvxihtmeena. <sup>25</sup> Sa' txã'sna pi'kxçxa Dxus tasxte utxaawa'ja's pakwesáa yuutxi's nwe'weçxa, bagaçxte yuhwa vxituwa'jmeete nvxiht-ya' ajana, txãa pa'gatey txã' bagaçxte yuhwa uumée itxi nes yuuwa'jsa', pkalsawe'sx ju'gu we'we pu'çxna.

<sup>26</sup> Pkalsawe'sx ju'gu Dxus tasxte we'we pu'çxsa' Jesus na'wěsa ewsatha'w peejx yu'. Txã' kīh pkal yuhwa ji'phmeesa, bagaçxte yuhwa ewmée yūuna fxi'zesamée, naa kiwetewe'sx na'wěsa meek yu'. Txãasak Dxus pukate kãhpkaçx jxūna u'jnisa yuu. <sup>27</sup> Pkalsawe'sx ju'gu we'we pu'çxwa'jsa nyafxiiwe'sxa' na'wětx een isa tajkx ikhçxa Dxus altalte kabu' txã'wě yūuwa'jsa meek yu'. Txãawe'sxa' nyafxte' peekx pkalpa'ga khuē'y txã'wě tajkx kabçxatx nasaa pkalpa'gawa txã'wěy yū'. Nawa Jesusa' een isa txã'wě tajkx ikhme', txãa yuuk uu tee dxi'jçxáa jxukaysa pa'gate. <sup>28</sup> Pkalsawe'sx ju'gu we'we pu'çxwa'jsatx Moises ley nvxiituççxa', naa kiwete nasa ahmeekwesaçxáatxku nvxiitu'. Nawa ley skhēwnite Dxus jurāyçxa txã'wě yūuwa'jsa nvxiituççxa', txajx Nçxi'k iiméh thaakwe ewsa'sku nvxiht bagaçxtewa nes yuuwa'jsa.

## 8

*Dxus u'se puutx we'weni's kxtey yuukahn*

*pu'çxsa' Jesusa'*

<sup>1</sup> Na'wē pkalsawe'sx ju'gu Dxus tasxte we'we pu'çxsa jī'tha'w txā' maatewa jxthaakwe ewsa cielute Dxus pukate kaçxçxa <sup>2</sup> pkalsawe'sx ju'gu we'we pu'çxna ūsa' Dxus ūsnite yuu u'kaçxa. Txāa Dxus ūsni' nasaa txaahnisame', txā'sa' Dxus yuuk txah. <sup>3</sup> Pkalsawe'sx ju'gu we'we pu'çxna ūssa nyafxiiwe'sxa' pkalpa'ga tajkx ikhçxa Dxus altalte kabna nes yuuwa'jsa jīçxa nvxiitnisatx yu'. Txāa pa'gak Jesukristowa kīhçxáawa nuykūuwa'j ji'phu. <sup>4</sup> Jesukristo' naa kiwete txā'wē pkalsawe'sx ju'gu we'we pu'çxna ūswa'ja's vxit wēewaça', ājawa'jmeene' yu', txā'wē ājakahmení Moises ley nvxiitnisatx ūs yu' pkalsawe'sx ju'gu we'we pu'çxsa. <sup>5</sup> Nawa naa kiwete txā'wē pkalsawe'sx ju'gu we'we pu'çxsa' naasáa cielute ma'wēçxah yūuwa'jna txā'sna kaajiyu'jniçxá'stxi selpi'. Txā'wē cielutewe'sxa's kaajiyu'jnisate íiçxáak Dxusna neewe'wena ūswa'j yat Moises txajaçte', Dxusa' na'jīna we'we: Ew mtheg, sa' thā'j vxiçte adx ma'wē kaavxya'ja'the', txā'wēy yūune'ga jīk. <sup>6</sup> Nawa Dxus tasxte kwe'sx ju'gu we'we pu'çxsa Jesukristo selpiini' thaakwe ewa', txāa pa'gatey Dxus thaakwe ew pu'çxwa'ja's iiméh ew puutx we'wek txā'sna selpiina ūsa'.

<sup>7</sup> Nyafxíi puutx we'weni' ew kasehwaça', e'su ki' puutx we'wewa'j peejmeene' yu'. <sup>8</sup> Nawa txā'wē ew kasehpa'gamée, nasa' ewmée fxi'zepa'ga, Dxusa' na'jīk:

Israel vxite' Judá yakh adxa' ki' u'se puutx we'wewa'j en pa'jana,

9 Egipto kiwejũ peeygãhna kutxi'jçxa i'kwe'sx  
yaçgawe'sx yakh puutx we'weth  
txã'wēmée yuuna.

Txãa ente' adx puutx we'weni's kxtey yuumeeta',  
Txãa pa'gath thegmée nvxiht.

10 Nawa txãa e'su' Israelwe'sx yakh na'wē puutx  
we'we'nja jĩ'k Dxusa':

Adx jxkaahnitxi's txãawe'sxtxi kaajiyu'jçxa,  
ũuste fxi'jçxa nvxiitu'nja.

Sa' adxa' txãawe'sx Dxus yu'nja,

Aça' txãawe'sxa' adx jĩi yuutxna.

11 Dxusa's jiyukahn teeçxsa na'wēçxah  
kaapiya'jwa'j ji'phumeetxna, txãawe'sx  
nwe'sx vxite' txãawe'sx nyakhçxáa  
yuhtxwa,

Txãa pa'gatey le'çxkwesa ma'tx yuu meeçxa'  
thē'jsa ma'tx yuu nawa thēymée jiyuya'  
ãjatxna adxa's.

12 Sa' txãawe'sx pkaltxi peltunãyçxa, peena  
yu' багаçxteçxáa yuhwa yajxme'nja  
txãawe'sx pkaltxi's jĩ'k.

13 Dxusa' ki' vxite u'se puutx we'wewa'j ji'pthu  
jĩçxa', yaçíiwe'sxa' selpiime' jĩçxane' txã'jĩ'. Aça'  
selpimée yuuna pa'jsa' skhēwwa'jsana.

## 9

*Dxus ũsni naa kiwetewe'sx vxite' cielutewe'sx*

1 Dxus puutx we'wenisa nyafxiiwe'sxa'  
jxkaahni ji'phuk Dxusna neewe'wena  
kxtey nwēese'khan dxuus yat naa  
kiwetewe'sxçxáaçxawa. 2-4 Txãa yata' e'z jwedku  
txudeni yu': nyafxte u'kana kũunisate Dxusna

neewe'wena ũsni j̄nisatetx bela txaahnisa vxite' pan āsxni mesa vxyuu bee altal incienso kabnisa txã'wēsa ũsu'. Aça' e'ste txudenisate' kim yuhwa u'kanimeesa naasáa Dxus yuuçxáa ũsni j̄nisak yu'. Kxteea' kaja vxyuu behçxaçxá's jxuka skadnisak ũsu'. Txãa kaja dxiite yu' teeçx vxyuu bee jaçxu maná ji'phsa, vxite' Aaron khaabu ye'çxku txãa, vxite' Dxus jxkaahni kwet taplate fxi'jni yuuk txãatx jxaawni ũsu' kaja dxiite. <sup>5</sup> Txãa vxyuu bee kaja kajkwete yu' Dxus angel na'wēysatx piisaçxa txaahni ũsu', Dxusa' ayte nesku yu' j̄ina kaajiyu'jsata'. Sa' txãawe'sx fxuu ku'taju jxukatx aphna ũsu', na'wē pkalpa'ga tajkx ikhçxa txãa eea's jxūna kühçxa txaja'tx txã'sna. Nawa txã'wēsatx ew āate pta'sxwa'j en ji'phmeeth āçxhíi yu'.

<sup>6</sup> Sa' txãa yatte txã'wē pheu'jni nyafxte u'kana kũunite yu' pkalsa ju'gu we'we pu'çxsawe'sxa' u'kana nestxi yu', ma'wē yūuwa'ja'swa kxtey yuuna. <sup>7</sup> Nawa vxite ahte e'ste yu' txãawe'sx npiiçthē'j teeçxçxáak u'ka', anxute tee dxi'jçxáa. Sa' kxtee u'kaççxa', perdon pējxya' takx eea's jxūçxak u'ka', peekx pkalpa'ga vxite' nasaa pkalpa'ga j̄ii yã'jçxa. <sup>8</sup> Txã'wē nyafxte u'kanisa Dxusna neewe'wena ũsni j̄nisa' selpiina nesku yu' Dxusa's neewe'wewa'j. Nawa vxite ahte Dxus yuuçxáa ũsni j̄nite u'kawa'j dxi'j yu' phate-meyku yu' txã'wēk Dxus Espiritu' kaajiyu'ju'. <sup>9</sup> Kĩhwa jxuka txã'wē yūunisa' āçxh naa ensuwe'sxa's kaajiyu'jsaçxáak yu'. Kxtee tajkx ikhçxa Dxusna weçxana kabnisa' txãawe'sx pkaltxi khukhya' ājawa'jsame'. <sup>10</sup> Txã'wē yūunisa' Dxus yu'pthehpkaçxçxáatx selpiwa'jsa

yu', txãasatx kajkwekhẽ ãakhẽwe'sxa'sçxáa jxkaaja' ã'nisu, tudxnisu, kakwete ate fxi'zewa'j txã'wẽsatx.

<sup>11</sup> Nawa ãçxha' pkalsa ju'gu we'we pu'çxsa thaakwe ewsa ãythasnisa pa'kh txã' Kristo'. Sa' txajx yujuni' nasaa vxitnisa naa kiwetewe'sxmée, cielute iiméh ewsatte u'kaçxa kxtee pkalsa ju'gu we'we pu'çxna selpiina ãsa'.

<sup>12</sup> Sa' Kristo' Dxus yuuçxáa ãsnite kĩh pkal yuhwa meetek u'ka. Nawa txã' kapla ee vxite' klaa luuçx ee txã'wẽsatx jxũçxa Dxus tasxte u'kame'. Txajx ee yuunak pkawçxa u'ka tee dxi'j yuuçxáa. Nawa jxukaysa bagaçxteçxáa yuhwa vxitumée ewte neeyũuwa'ja's vxitya'k txã'wẽ yũu.

<sup>13</sup> Na'wẽ klaa ee kapla ee vxite' klaa luuçxa's altalte kabnisa khuuç txã'wẽsatx nasaa kakwekhẽ pẽ'çuçte', ãakhẽ kazx pẽetheni's yaatesaa dxihte', <sup>14</sup> Kristo' ee yu' wejx thaakwe yaateya' ãjawa'jsana. Txã'wẽ yaateya' ãjakahní, Dxus Espiritu pçuwa'jmeesa pu'çxte Kristo' peekíi ya'dukhçxa kĩh pkal yuhwa ji'phmeek txajx eea's pkaw pkalsa pa'gate. Txãasa txajx eea' kwe'sx ewmée ãus yaakxni dxiitewe'sxa's khukhwa'jsa', Dxus itxisa's selpiiya' ãjakahn.

<sup>15</sup> Dxusa' kwe'sxtxi nwe'wewa'ja's u'se pu-utx we'wek txã'sna Jesukristo' kxtey yuuna ãsa', na'wẽ nyafxte Dxus puutx we'wek txã'sna nwẽese'jmeeçxa pkalte wetetha'w txãa pkalwa peltunãynik yuu Kristo uupa'ga. Txah Jesukristo nwe'wenisawe'sxa' jxpa'gaya' ãjatxna Dxus jĩi bagaçxteçxáa yuhwa pçuwa'jsamée kwe'sx jĩiçxaçxáa yuuwa'ja's nvxihtku txã'sna.

16 Nawa na'wēsa's miijajkxwe: Adx uute', adx ji'phuni's idx uweene'ga jīna puutx we'weçxa eçte fxi'jçxa nvxiitnisa', selpiiyujuna. 17 Nawa txã'jīna nvxiit-sa uuteçxáa txãa eça' selpiina. Txã'jīna nvxiit-sa uumeyte yu', txãa eça' selpi'çme'. 18 Txajíik Dxusa' nyafxii puutx we'wena fxi'jçxa nvxiitnisa'swa ee pkawçxa nvxiht selpiina neeyūukahn. 19 Txã'sa' na'wēk yūu Moisesa': Nasa jxukaysatx pta'sxku ley jxkaahni ma'wētewa jxuka. Txã'wē yūuçxak khas beh vxite' ējxa ku'ta yakh klaa luuçx ee vxite' kapla eete yu' ka'dnisate akhçxa Dxus puutx we'wena fxi'jçxa nvxiitni eç kajkwesu pē'çhuç. Sa' nasatxwa jxukaysatx txã'wēyku yūu na'jīna: 20 Dxusa' na'wē i'kwe'sxtxi jxkaahna puutx we'wena fxi'jçxa nvxihtku txãa eça' āçxha' i'kwe'sxtxi jxkaahna selpiiya' ājana, ee pkawni yuupa'ga jík. 21 Sa' Dxusna neewe'wena ūsni yat vxite' kxtee kīhçxah ne'ta ūsu' txāatxwa txã'wēyku ee yakh pē'çhuç Moisesa'. 22 Ley we'weçxa': Kīhnawa jxuka ee yakh yuuçxáa yaatewa'j yuuna, aça' ee pkawmeete yu', pkala' peltunāynimée yuutxna jīnak jxkaaja'.

*Kristo uuni' pkaltxi jxuka khukhku*

23 Txã'wē cielute ma'wēna txã'sna kaajiyu'jsa naa kiwetewe'sxçxáa yuhtxwa yaatena ūswa'j peejxtxi yu', tajkx ikhçxa txãa ee yakh. Aça' cielute ūswa'jsatx yaatewa'j yu' wejxku thaakwe ewsa peejx yu', tajkx ikhe'tx txã'wēsamée. 24 Kristo' naa kiwete nasaa txaahnisateçxáa u'kame'. Txã' cielute yuuk u'ka, sa' āçxha' kxtee Dxus tasxte kwe'sx ju'gu we'we pu'çxna

ũsa', aça' Dxusna neewe'wena ũsni yat naa kiwetewe'sxa' cielute ma'wēna txã'sna txã'wēy piisanisaçxáak yu'. <sup>25</sup> Pkalsawe'sx ju'gu we'we pu'çxsa npiiçthē'jsa' aanxu isa tee dxi'jçxáak u'ka', Dxus yuuçxáa ũsni jñisate. Nawa peekx eemée, takx eeçxá'sku jxũçxa u'ka', kx-tee pē'çhuçya'. Nawa Kristo' uuçxa kujus Dxus tasxte u'kame'. <sup>26</sup> Txã'wē yũuwaça', naa kiwe's vxitiyna aanxu isa uuna nesne' yu-uwa'jsa yu'. Nawa txã'wē yũumée, Kristo' tee dxi'j yuuçxáak kluuste uuya' vxyaa jxukaysa pkaltxi khukhya'. <sup>27</sup> Txãa pa'gak nasatxwa tee dxi'jçxáa jxukaysatx uuwa'jsa vxitçxa txãa e'su' ma'wēsaçxawa Dxus tasxte paswa'j vxitni yuu, <sup>28</sup> txã'wēy Kristowa tee dxi'j yuuçxáak kluuste uu maazkuēesa pkaltxiwa jxuka khukhya'. Sa' txãa e'su' ki' vxyaana, nawa pkaltxi khukhya' ki' uuya'mée, naasáa txã'sna ũythassatx pe'jna u'jya'çxáa txã'wē vxyaana.

## 10

<sup>1</sup> Moises leya' naasáa thaakwe ewsa vxyaaya' ũsu'tx txãatx kaajiyu'jsaçxáatx yu' txã' isa ewsa yã'j yu'çmeeta', txãasa na'wē Dxus tasxte utxaaya' aanxu isa tajkx ikhna nestxi yu' txãawe'sxtxi' pkal ji'phmeesa vxit-ya' bagaçxteçxáa yuhwa ãjawa'jsa meek yu' leya'. <sup>2</sup> Txãa leya' nasatx pkal ji'phmeesa vxit-ya' ãjasaawaça', na'wē pkalpa'ga maazkuēe uswa tajkx ikhna nestxi yu' txã'wē yũuna nes yu-uwa'j peejxmeene' yu'. Txãa pa'gatey pkalpa'ga tee dxi'j tajkx ikhçxa kabnijũyã'j yu', pkalsatha'w sũhwa'j peena yu' ũsuthemeena. <sup>3</sup> Nawa

txã'wẽ yũupkaçxte, aanxu isa pkalsatha'w sũhna nesku ya'yũ', <sup>4</sup> txãa tajkx ikhnisa klaa ee vxite' kapla ee txã'wẽsa' pkaltxi khukhu'çmeeta' naa pa'ga.

<sup>5</sup> Txãa pa'gak Kristo naa kiwete pa'jaççxa', na'jĩna we'we Dxusa's:

Tajkx ikhçxa kabni's jxpa'gameeçxa, adx kakwe yakh uuwa'ja'sgu vxit.

<sup>6</sup> Pkaltxi khukhya' tajkx ikhçxa kabnisatx weçxa'çmeeg.

<sup>7</sup> Txahth na'jĩ: Dxus, iidx jxthãasniçxá's kxtey yuuya' yuhth,

Adx fxi'zewa'ja's ma'wẽ fxi'jni ũsna txã'sa' kxtey yuuya' jĩk.

<sup>8</sup> Na'wẽ Kristo we'weçxa': Pkaltxi khukhya' tajkx ikhçxa kabnisatxi's weçxa'çmeeg, (txã'wẽ yũuwa'ja's makwe ley jxkaahnisatewa), <sup>9</sup> txãa pa'ga: Dxus, iidx jxthãasniçxá's kxtey yuuya' yuhth jĩk Kristo'. Isa ew jiyute yu', naa tajkx ikhna ũsni's ivxiituçxa, txãa pa'gate vxite uuwa'jsath nvxiitu' jĩçxane' txã'jĩ'. <sup>10</sup> Jesukristo' Dxus jxthãasni's kxtey yuuçxa txajx kakwe's peekíi ya'dukhçxa kluuste uuk jxukaysa pa'gate tee dxi'jçxáa. Txãa pa'gak Dxusa' kwe'sxtxi's txãa jĩi vxit.

<sup>11</sup> Pkalsawe'sx ju'gu we'we pu'çxsa judiuwe'sxa' txã'wẽ yuh een isa maazkuẽe uswa tajkx ikhçxa altalte kabna nestxi yu' jxkaasewa'jmée, makwe txã'wẽ yũunisa' bagaçxte yuhwa pkaltxi' khukhwa'jsameetewa.

<sup>12</sup> Nawa Jesukristo' pkalpa'ga tee dxi'j yuuçxáa kluuste uuni yakhçxáa jxuka jxã'jnik yuu txãaçxáa bagaçxtewa selpiwa'jsa. Txãasak



cielute Dxus pukate kaçx. <sup>13</sup> Sa' açxha' kxtee ũsa', txã'sna açesa jxukaysa txã'sçxaçxáana nwēese'jwa'ja's Dxus vxitna jxã'phkaçx. <sup>14</sup> Txãa pa'gatey tee dxi'j kluuste uuníi yakhçxáa jxuka jxã'jnik yuu txajx nasa yuuwa'jsawe'sx jïi bagaçxtewa selpiwa'jsa. <sup>15</sup> Txã'wē Kristo tee dxi'j kluuste uuniçxáa bagaçxtewa selpiwa'jsateiüçxáak Dxus Espirituwa na'jïna we'we:

<sup>16</sup> Txãa en skhēwnijū' na'wē yūuya' puutx we'we'nja jï'k Dxusa':

Adx jxkaahnitxi's txãawe'sx ũuste kxu'akhe'je'nja peçxkanakahmén.

<sup>17</sup> Sa' txã'wē yūunijū', txãawe'sx ewmée yūuna fxi'zeni pkaltxi's bagaçxteçxáa yuhwa ya-jkxme'nja jï'k.

<sup>18</sup> Txã'wē pkaltxi's jxuka peltunāynijūyã'ja', peena yu' pkalpa'ga tajkx ikhçxa kabna ũswa'j peejme'.

### *Dxus tasxte utxaawa'ja's jï'ptha'w*

<sup>19</sup> Txãa pa'ga, yakthē'jwe'sx, açxha' kïh pkal yuhwamée Dxus yuuçxáa ũsnite u'kawa'ja's jï'ptha'w, txã'wē Jesukristo' ee pkawçxa <sup>20</sup> Dxus tasxte u'kawa'j dxi'j u'sesa's phaadek. Kxtee Dxus ũsnite' kim yuhwa u'kakahmén txudenik ũsu', nawa txãa yuuk kluuste uuçxa kxtee txudeni's phaade kwe'sx u'kakahn. <sup>21</sup> Txãasa Jesusa' Dxus tasxte we'we pu'çxna ũsa' Dxus luuçx jxukaysa ju'gu. <sup>22</sup> Txãa pa'ga Kristo' pu'çxyujuna sūhna ũusuh jxuka yajkçxçxa Dxus tasxte ũukhmée utxaaga, txãa pa'gatey Kristo' kwe'sx ũuste pkaltxi' jxuka yaatek, aç'a kwe'sx kakwewa

bautismote akhnik yuu, yuuwemeesatha'w sũhnaçxáa yaakxkahn. <sup>23</sup> Áçha' Dxus tasxte utxaawa'ja's jiiyã'tha'w na' Dxus yakh txutemée txãa yakh yuuçxáa çxhãçxha fxi'zega. Txãa pa'gatey Dxusa' kwe'sxtxi bagaçxte yuhwa pçumée ïtxi fxi'zewa'ja's ũsya' puutx we'wek txã'sa' kxtey yuuna. <sup>24</sup> Sa' ew yũuna peeygãhna fxi'zewa'ja's ji'phuya' puutx ya'pu'çxhiga kxteeçxah. <sup>25</sup> Vxite na'wẽtx kwe'sx pkhaakheçte pa'ja'çmée txã'wẽ yũumée, wejxwa teeçxsa na'wẽçxah kxteeçxah puutx kçxhãaçxha'jna fxi'zega, na'wẽ Kristo kĩwa'j enwa utxaacyã'ja' naa pa'ga.

<sup>26</sup> Txã'wẽ ewsa's äate pta'sxni wala ew jiiçxa txã'sa' ahçena txute'nja'w, açã' txã'wẽ yũusa's peena yu' peltunãywa'jmée yuuna. <sup>27</sup> Naasáa iiméh seena' ũukhũkhsaçxáak ũythasu', Dxus kastigo ipx seena'sa jxuka ivxiituwa'jsa Dxusna açesawe'sxtxi. <sup>28</sup> Ma'wẽga Moises leyçxáa yuhwa txã'sna nwẽese'jsameetxi' e'z meeçxawa tekhnasa txã'wẽ yũuni's jiiisatx pẽjxçxa isa dxihte', peeygãawa'jmée ikhwa'jçxá's vxitu'. <sup>29</sup> Açã' Dxus Nçxi'ka's ahçeçxa weeçxina, sa' txajx eea's pkawçxa uuni'swa kĩhte yuhwa seelpimeesa na'wẽ weeçxina, sa' txã'wẽy Dxus Espiritu peeygãasa'swa açesa', wejx seena' kastigãyni yu'nja'w sũhwa'ja's mji'phuwe, txã'wẽ Jesukristo eea' Dxus puutx we'weni's kxtey yuuwa'ja's vxitwa'jsa' txãa eeiçxáa i'kwe'sx pkaltxiwa peltunãysa' na's txã'wẽ açepa'ga. <sup>30</sup> Dxusa' na'jĩnak we'we txã'sa' mpa'yajxwe: Adxçxáa kastigãywa'jsath, txã'sa' adx jiine'tka jĩ'k. Sa'

ki' we'weçxa': Adx jxpe'jni nasatxi's kastigaĩ'nja jĩ'k. <sup>31</sup> Txãa pa'ga seena' yuh ũukhũukha', Dxus ĩtxisa kusete kastigãywa'j wetena pa'the'.

<sup>32</sup> Nawa txã'wẽ yũuya'mée i'kwe'sxa' nyafxiitey fxi'zeni's miijajkxwe: nyafxçxah Dxus yuwe's jxpa'gaççxa', wala pxthaa yuui'kwe txakwe wala thëysa pa'thewa. <sup>33</sup> Sa' i'kwe'sx maafia' wëesxuna nasaa ksxavxyte pãpani i'kwe yuu, aç'a' vxitewa txã'wëy nxussawe'sx yakh ja'daçxah nxussa i'kwe yuu. <sup>34</sup> I'kwe'sxa' karcelte ũssawe'sx pa'gate peeygãawa'ja's ji'phui'kwe, sa' i'kwe'sx ji'phunitx kusa'jaçte', ũusaçxamée weçxanai'kwe neeyũu. Cielute bagaçxteçxáa yuhwa pçuwa'jsamée thaakwe ewsa's jiiçxai'kwe txã'wë yũu. <sup>35</sup> Txã'wësa's jiiyã'jçxa', peçxkananuwe, txãa pa'gatey txã'wëçxáa yajkxna fxi'zepa'ga txã'wë seena' wala ewsa's jxpa'gawa'jsai'kwe. <sup>36</sup> Dxus jxthãasni's kxtey yuuya' nxuswa'ja's wa'lmée jxpa'gawa'j ji'phi'kwe. Txã'wë yũuçxa', Dxus peesni seena' wala ewsa's jxpa'gane'kwe. <sup>37</sup> Txã'wëme', Dxus librute na'wëk we'we':

Wejx jxthëeyuumée dud yuh kũjana

Txãa kũwa'jsa' txaçxhimeena.

<sup>38</sup> Aç'a' Dxusçxáana yajkxna fxi'zesa' ewte neeyũuna.

Nawa txã'wë yũumée txuteete', txãa yakha' wët fxi'zeme'nja jĩ'k.

<sup>39</sup> Nawa na'wë txuteeçxa vxituwa'the ũsta' txãatewe'sxmeetha'w kwe'sxa', wejxwa kwe'sx ũus vxitukahmén Dxusa'sçxáa yajkxna fxi'zesatewe'sxtha'w.

# 11

## *Dxusa's ũuste yaakxnisa*

<sup>1</sup> Dxusa's ũuste yaakksa' yafxju ãate yu' uymeeçxawa, ũuste yu' jiik ya'fxi'ze' kxtey yuuyujuna sũhna ũyhasna. <sup>2</sup> Kwe'sx yaçgawe'sxa' txã'wẽ yaakxwa'ja's ji'phutx, txãasatx Dxus dxi'pte ew fxi'zesa yuu.

<sup>3</sup> Sa' kwe'sxwa txã'wẽy yaakxwa'ja's ji'ptha'w, txãasatha'w açxh na'wẽ kiwe ũsa' txã'sa' Dxusa' txajx we'weni yakhçxáa vxitne' nyafxíi yu' kíhwa meetewa sũju'.

<sup>4</sup> Abela' tajkx ikhçxa kabte', Dxusa' weçxayujuna sũhna ũuste jiiçxak txã'wẽ yũu, Kain jĩite thaakwe ewsa. Aça' txã'wẽ yũunisa' Dxus yakha' ewsane' yu' naa pa'ga Dxusa' jxpa'gak. Aça' Abel yu' uuni', nawa Abela' txã'wẽk Dxusa's ũuste jxpubamée yajkx jĩni yu' açxpa'jwa ũsa'.

<sup>5</sup> Enokwa txã'wẽ Dxusa's ũuste ew jiiçxa Dxus yakhçxáa fxi'zepa'ga, uumey pe'jna u'jnik yuu cielun. Txãa pa'ga peena yu' uymeeta', txã'sa' Dxusku pe'jna u'j txãa pa'ga. Aça' Dxus librute Enokha's we'weçxa': Nyafxíi uumey Dxus yakh weçxanak fxi'ze' jĩ'k. <sup>6</sup> Nawa ũuste Dxusa's yuuçxáa yaakxwa'ja's ji'phmeete', Dxus yakh weçxana fxi'zeya' ya'ãja'çme', txãa pa'ga txajx tasxte utxaasa' Dxusa' ũsna sa' txã'sna pakwete', nwe'wena sũhwa'ja's ũuste ji'phuwa'ja'.

<sup>7</sup> Noewa txã'wẽy Dxus we'weni' kxtey yuuyujuna sũhwa'ja's ũuste jiik yu'. Txãasak kastigo nus pa'jyujuna sũhçxa Dxus jxkaahni's nwẽese'jçxa barko's vxit, txajx yattewe'sxtxi

ixuka nwe'weya'. Sa' Dxusa' kxtey yuuyujuna sũhwa'ja's ũuste ji'phupa'ga, Dxusa' kxtey yuute', naa kiwetewe'sxa' ya'kastigãytxi açã' Dxusa' Noea's ewsa' jĩnak we'we.

<sup>8</sup> Abrahamwa txã'wẽy Dxusa' kxtey yuuyujuna sũhwa'ja's ũuste jiiçxak, Dxus kiwe ũsya' pa'yate', nwẽese'jçxa kasehna u'j, nawa mtee pa'jwa'ja'sçxáa yuhwa jiimeek yu'. <sup>9</sup> Txã'wẽ Abrahamana' Dxus kiwe ũsya' neeyũune' txã'sa' bagaçxteçxáawa kxtey yuuyujuna sũhwa'ja's ũuste jiiçxak maa sũhmée txagaçxhíi yu' pa'jsa na'wẽçxáa tultu txahçxa fxi'zena ũsu'. Açã' Isaak, Jakob txãawe'sxwa txãa kiwe's jxpa'gawa'jsaçxawa, txã'wẽyçxáatx pa'jsa na'wẽ fxi'zena ũsu'. <sup>10</sup> Txãa pa'gatey Abrahamana' cielute Dxus vxitni çxhaba's jxpa'gawa'ja'sku ũythasna ũsu', txãasak maa sũhmée fxi'ze'.

<sup>11</sup> Abrahamana' txã'wẽ Dxus we'weni' kxtey yuuyujuna sũhwa'ja's ji'phupa'gak Sara' txakwe wala thẽ'khwe luuçx ji'phuwa'jsamée yã'jçxawa, luuçx ji'phu. <sup>12</sup> Txãasak Abrahamana' txajx ji'j iiméh wala kuh ji'phsa yuu, cielute estrelxa vxite' yu'pukasu kwetmusetx ma'wẽga isate ya'ãja'çmée txã'wẽk kuh ji'phu, txakwe iiméh wala thẽ'khwe yã'jçxawa.

<sup>13</sup> Na'wẽ Dxusna yaakxsa nakwe wala kuh kxsustha'w txãawe'sxa' Dxus ũsya' neeyũuk txã'sa' jxpa'gamey uutx, txãasatx e'su txaçxteçxáawa Dxusa' kxtey yuuyujuna sũhna weçxana yaaki'. Sa' txãawe'sxa' naa kiwete tudtewe'sxçxáa ne'tka'w jĩnatx we'we. <sup>14</sup> Txãawe'sxa' txã'wẽ we'weçxa' ew jiyute yu', vxite ahte ũsya' u'jwa'ja's pakwesáa ne'ta yu'.

<sup>15</sup> Txãawe'sxa' maa kiweju yuusaaxxawa txã'sna yajxna ũswaça', txãa kiweníi sxawedwa'j ne'ta yu'. <sup>16</sup> Nawa txãawe'sx ũswa'j thaakwe ewsa's ne'ta pakwesáa yu' cielutewe'sxna, txãasatx sxawedmée. Txã'wě sxawedmeeta' txãa pa'gak Dxusa' thaame'çmée txãawe'sx Dxusthu jĩna ya'kxsuswa'ja's, txãasa txãawe'sx ũswa'j pheu'jni ji'pha'.

<sup>17</sup> Abrahana' txajx nçxi'k Isaakha's ikhtewa Dxusa' ki' itxi vxituna sũhwa'ja's ũuste jiiçxak ikhya' jxũna u'j. Dxusa' Abraham kĩh yũutewa jiyuya' sũhçxa txajx nçxi'k teeçxçxáasa's ikh kaathewa, wa'lmée kxtey yuuya'wak yu'. Makwe Dxus txãa yakh puutx we'weçxa': <sup>18</sup> Iidx ji'j Isaaktewe'sx txã'wě wala penatxna jĩna we'wetewa, ikhya'wak yu'. <sup>19</sup> Nawa Abrahana' txajx ũuste yu' uutewa Dxusa' ki' itxi vxituna sũhwa'ja's ji'phu'k. Txãasa isa ew yajkxte yu', Abraham nçxi'ka' uusaawe'sx ksxavxyu ki' itxi yuusáa na'wěsa'.

<sup>20</sup> Isaakwa Dxusa' kxtey yuuna sũhwa'ja's ũuste ew jiiçxak txajx nçxi'k Jakob Esau txãawe'sxtxi' bedicion wala jxpa'gane'kwe jĩna we'we.

<sup>21</sup> Jakobwa Dxusa' kxtey yuuna sũhwa'ja's ũuste ew jiiçxak uuçyã'jçxa', José nçxi'ktxi teeçxsa na'wěçxah jxukaysatx wala bedekĩni yuune'kwe jĩna we'we, sa' Dxusa's neewe'wek kiiçhuçxa.

<sup>22</sup> Josewa Dxus pu'çxte' Israelwe'sxa' Egipto kiwejũ kasejetxna sũhwa'ja's ũuste ew jiiçxak, uuya'wayã'jçxa txãawe'sxtxi neewe'we txajx kakwe's mtee jxũna u'jçxa pedaawa'ja'swa.

23 Moises neywe'sxwa Dxusa' nwe'wena sũhwa'ja's ũuste ew jiiçxatx tekx a'te uta Moisesa's sũth, luuçxa' wala zhiçxkwe yu'ne' txãa pa'ga. Makwe Egipto kiwete jxkaahsa yu' ikh kaathewa ikhmeeta'.

24 Moiseswa Dxusa' pu'çxhina sũhwa'ja's ũuste ew jiiçxak, Egipto kiwete jxkaahsa niisa nçxi'k jĩna kxsusni yuuwa'j yu'sa' wa'l, walaana kãhçxa'. 25 Sa' naa kiwete pkalte weçxana fxi'zepkaçxte, wejxwa ũukhmée Dxus txhitxhnisa yakh ja'daçxah pkxuuni yuuwa'ja'sçxáak yajkx. 26 Txãa pa'gatey cielutewe'sxa's jxpaga'gawa'ja'sçxáak yajkçxaxa fxi'zena ũsu'. Txãasak Egipto kiwete iiméh seena' wala ji'phuni's yaakipkaçxte, Kristo na'wëy yaaçeni pkxuuni fxi'zeni's ji'phuya'çxáa yajkx. 27 Dxus pu'çxwa'ja's ũuste ew jiiçxak Moisesa' jxkaahsa ũusçxani yu'sa' ũukhmée Egipto kiwejũ kasehna u'j, sa' Dxus tasxu le'çxkweçxáa yuhwa txuteméek fxi'ze, Dxusa' vxyaasameetewa yafxju uyna ũs na'wë yajkxna.

28 Dxusa' nwe'weyujuna sũhwa'ja's ew ũuste jiiçxak Moisesa' Paskua fxiesta's vxitçxa eea's vxitxkhê sxūsx kaah, ikhwa'jsa angel sêhçxawa Israelwe'sx luuçx nthê'jsa maa yuhtxwa ikhkahmen.

29 Israelwe'sxwa Dxusa' pu'çxhina sũhwa'ja's ũuste ew jii yuupa'gaçxáak, mar bejuy uykhëwwa'j dxi'j phaate txãawe'sx uykhëwkahn. Aça' Egiptowe'sxwa txã'wëy uykhëu'nja'w sũhçxawa txãawe'sxa' ãkhtee uutx yu' afxihbte.

<sup>30</sup> Dxusa' pu'çxhina sũhwa'ja's ũuste ew jiiçxatx Israelwe'sxa' Dxus we'weni's nwẽese'jçxa txã'wẽ siete enpkaçx Jeriko çxhabte muralxa peeku'j tadxina ũsu', açã' txã'wẽ nwẽese'pha'gak muralxa' wete.

<sup>31</sup> Rahabwa Dxusa' nwe'weyujuna sũhwa'ja's ũuste ew jiiçxa, Israelwe'sx e'zsa kxtee peethegu'jya' pa'jsatx ewku jxpã'ga. Txãa pa'gak uumée, Dxusa's nwẽese'jsameewe'sx vxite yu' uutewa.

<sup>32</sup> ¿Kĩh jwee yu' pta'sxitka? En ji'phwaç yu' pta'sxwa'j yu' walaíçxãa ũsa', Gedeon, Barak, Sansón, Jefxté, Davxid, Samwel, Dxus yuwe pta'sxsawe'sx txãawe'sxtxi we'wewa'j.

<sup>33</sup> Txãawe'sxa' Dxusa' pu'çxhina sũhwa'ja's ũuste ew jiiçxatx maai' yu' gweçxate puiiçxa knay, vxite' ewtxi jxkaahna fxi'ze, vxite' Dxus pu'çxni's jxpã'gatx, vxite' león yuwetxwa aphtxi,

<sup>34</sup> vxite' seena' ipx walajuwa çxhavxymeeta', vxite' ikhsa kusejuwa iyutx, vxite' puiiya' çxhãçxhameekwetewa kçxhãçxha'jnisa yuuçxa, gweçxate iiméh kuhsatxwa knaytxi.

<sup>35</sup> Naapkaçxha' u'ywe'sxwa txãawe'sx luuçx uunisatx ki' itxi vxitni jxpã'gatx. Vxite' seena' wala pkxuuni yuuçxa uutx, ki' itxi yuuwa'ja's ji'phuçxa thaakwe ewte fxi'zeyã' sũhçxa, nwe'wewa'j yu'sã' jxthãasmeeta'.

<sup>36</sup> Naapkaçxha' vxite' weeçxna peçxujkweçxa çam kadenaju tudçxa karcelte txaahnitx yuu. <sup>37</sup> Vxite' kwet wãatatahçxa ikhnitx yuu. Maai' yu' pxãhsu pẽçnitx yuu. Vxite' iiméh seena' wala kxũusu'jni yuutx. Vxite' kçxilxuh ikhnitx yuu, naapkaçxha' vxite'



ahçeçxa neeuni yat ji'phmeetx pekühnaçxáa ũsu', kīhwa ji'phmeeçxa piisxáa kha'tx kapla kha'tx txã'wěsaçxá's pã'çxçxa, nxuste pkxuunitx fxi'zena ũsu'. <sup>38</sup> Txã'wě pkxuunisawe'sxa' nasa u'pnimée kiwesuçxáatx fxi'zena ũsu' yu'khsu, kiwe kafxsu. (Nasa txã'wě Dxus yakh zhiçxkwe fxi'zesa yakha' naa kiwe' ũsweçxte yuuwa meena.) <sup>39</sup> Dxusa' pu'çxhina sūhwa'ja's ũuste ew jiiçxa txãawe'sx jxukaysa txã'wě seena' yūuni yuuçxawa, Dxus ũsya' neeyūuk txãa yu'sa' txagaçxhíi yu' jxpa'gameeta', <sup>40</sup> txãa pa'gatey Dxusa' thaakwe ewsane' ji'phu' ãçxh naa ensu kwe'sx jii yã'jçxa. Aça' txãawe'sxa' kwe'sx yakh ja'daçxah jxpa'gawa'jsaçxatx txagaçxhíi yu' jxpa'gamée.

## 12

### *Jesukristo yuuçxá's yajkxna fxi'zega*

<sup>1</sup> Dxusa' pu'çxhina sūhwa'ja's ũuste yaakx-sawe'sx nakwe wala kuh ũsta' aça' kwe'sxa' txãawe'sx ksxavxyte ũstha'w. Txãa pa'ga pkal kaypuba'jwa'jsa's nvxihtna, kīhwa Dxus yakh fxi'zewa'ja's suwwa'jsa yu'sa' jxuka nvxihtçxa, makwe thēytewa Dxus yakh yuuçxáa fxi'zega, uu entepkaçx. <sup>2</sup> Jesukristo yuuçxá's pu'vxitumée yajkxna fxi'zega, txãa pa'gatey txãa yuuçxáak Dxusa' pu'çxhina sūhwa'ja's ũsu', sa' txãa yuuçxáak Dxusna yaakxni jxuka kxtey yuuna pa'phkaçx pu'çxhi'. Txã'wě yūuya'k Jesusa' thaamewa'j yu'sa' yajkxmée kluuste uu, txakwe wala nxusnxustewa. Txãa pa'gatey pxthaa yuuni

en skhēwnijū' wēt weçxana ũswa'ja's jiik yu',  
txāasak cielute Dxus ũsni pukate kaçx.

<sup>3</sup> Jesusa' nakwe wala pxthaa yuuk pkalsawe'sx  
kusete txā'sna i'kwe'sxa' yajkxçxa txāa na'wēy  
nxuswa'j en pa'thewa Dxus tasxu txutemée  
mfxi'zewe. <sup>4</sup> I'kwe'sxa' pkala's nvxihtçxa Dxus  
yakh fxi'zepa'ga iiméh seena' nxusnxus uuwa'j  
yu'sa' ji'phumey i'kwe. <sup>5</sup> Sa' txakwe dud  
yu' peçxkanawa'jmeena Dxusa' txajx luuçxtxi's  
na'wēk yu'kxpeje' txā'sna:

Dxus yu'kxpehna kastigāyni's açenu, adx nçxi'k,  
Sa' juuna' we'wete', nxusna ũusçxanu.

<sup>6</sup> Txāa pa'gatey Dxusa' txajx peeygāanisatxi's  
yu'kxpeje'k ew fxi'zekahn,  
Sa' txajx luuçx yuutxi's jxukaysatxku kastigaĩ' jĩ'k  
Dxus librute'.

<sup>7</sup> I'kwe'sxa' kastigāyni's mwantaĩwe, txāa  
pa'gatey Dxusa' i'kwe'sxtxi' txajx luuçx na'wēk  
jxpe'je'. Miiyajkxwe: ¿Maa luuçxçxá' ney  
yu'kxpehna kastigāynimeesa ũstxmanx?

<sup>8</sup> Dxusa' txajx luuçx yuutxi's jxukaysatxku  
yu'kxpehna kastigaĩ', nawa i'kwe'sxa'  
yu'kxpehna kastigāynimeesa yuuçxa', txajx  
luuçxmée vxitesate luuçxçxa txā'wē yuune'kwe.

<sup>9</sup> Kwe'sx le'çxkuēyte', naa kiwete kwe'sx tata  
yu'kxpehte', kxtey nwēese'je'tha'w na' açxha'  
wejx thaakwe ew nwēese'jwa'j ji'ptha'w kwe'sx  
Tata cielutewe'sxa's. Txā'wē nwēese'jçxa',  
pçumée itxi fxi'zewa'ja's ji'phu'nja'w. <sup>10</sup> Naa  
kiwete kwe'sx tatawe'sxa' txāawe'sx ũuste  
ma'wēne' wejx ew ũusuthe' yu'kxpehna  
jxpe'jwa'ja's txā'wēytxi yūuna jxpe'je', naa  
kiwete txaçxmée fxi'zewa'ja'sçxáawa. Nawa

Dxusa' kwe'sxtxi iiméh wala selpiwa'ja's kaapiya'jnak yu'kxpeje', txāawa ma'wē pkal ji'phmeena txā'wēy yuukahn. <sup>11</sup> Āçxh kastigāy íina yu' wala yuh akata', txāa pa'gatha'w jxpa'gaya' wa'lu'. Nawa txāa kastigo's jxpa'gaçxa ew fxi'zeya' piyate', wala yuh ewsa', jxpubamée weçxanak ya'fxi'ze' naa pa'ga.

*Dxus we'weni's weeçxya'mée mpa'yajkxwe*

<sup>12</sup> Txāa pa'ga wa'lmée çxhāçxha miijajkxwe, ewmeete fxi'zena ũsçxawa txāajũ mkaasehwe. <sup>13</sup> Txā'wē yūuçxa', dxi'j ewsaju peena yu' jxpubameene'kwe.

<sup>14</sup> Jxukaysa yakh ew fxi'zewa'jçxá's pa'pçxuna meswe, pkalte fxi'zemée. Txā'wē pkalte fxi'zeçxa', kim yuhwa Dxusa's uyya' ājameena.

<sup>15</sup> Dxus peeygāhçxa nwe'wenijüyā'ja', wala mpa'yajkxwe. Txā'wē jxpa'yajkçxa yuuçxáa i'kwe'sx maa yuhwa txā'wē vxitesatx kaypuba'jna ewmée yūusa yuumeene'kwe.

<sup>16</sup> Txā'wēme', maaí yu' ptammeesa kazx pkal yūuna fxi'zesa wáa yuune'kwe kīhwa ewsa's weeçxna ahçena. Miijajkxwe Esaua' txā'wēk ewsa's weeçxsa yuu, teeçx ũ' plaatu pa'gaçxáa peekx wēt fxi'zewa'ja's txweyku.

<sup>17</sup> I'kwe'sxa' peekx jiine'kwe Esaua' txā'wē yūuni e'su' ney bediciona's ki' jxpa'ga wēek, nawa ũsnimeek yuu. Aça' wala nxusna ũ'nek, nawa txajx txweyni's ma'wē yūuçxa yuhwa ki' kaasxwedu'jni yuume'.

<sup>18</sup> Israelwe'sxa' Sinaí thā'j vxiçte utxaatx kxte' ipx yuuçxáak seena' behna ũsu', sa' seena' yuh wala ũukhūkh çxhi'dxna ũsu'k kpi'sx

we'weni na'wē susna. <sup>19</sup> Sa' korneta susni vxite' txāawe'sxtxi jxkaahna we'weni's wala ũukhçxa jwee yu' we'we kaahmeeta'. <sup>20</sup> Txāa jxkaahni' na'wēk yu': Maawa naa thã'the teeçx çxidaçxáawa txajana txã'sa' kwet wāatatahçxa meeçxawa we'thu yājaçxa ikhwa'j yuuna, kīh tajkx ma'k yuu nawa jī'k. <sup>21</sup> Seena' yuh ũukhũukhsaçxáa vxyaana ũsu'k, txajiiçxáak Moises yuhwa na'jī: Ũukhnite yayanaçxáa ũsthu jī'k.

<sup>22</sup> Nawa i'kwe'sxa' txã'wēsateçxáamée thaakwe seena'sa tasxte utxasáa i'kwe: Teeçx thã'j Sion yaasesate Dxus itxisa ũsnite, cielute Jerusalen çxhabte, angeleswe'sx iiméh seena' kuhsa pkhaakheçxa Dxusa's tuuthe'jsawe'sx tasxte, <sup>23</sup> Dxus luuçx cielutewe'sx tasxte, Dxus nwe'wenisawe'sx tasxte, Dxus seena' juuna' jxukaysatx jxkaahsa tasxte, <sup>24</sup> Dxus u'se puutx we'weçxa nvxiitni's kxtey kxũ'ju'jwa'jsa Jesus tasxte, Abel ee na'wēsamée Jesus ee pkawnisa' thaakwe ewsate txã'wēsa tasxte utxasáa i'kwe.

<sup>25</sup> Txāa pa'ga wala mpa'yajkxwe, kwe'sxtxi we'wesa cielujuwe'sxa's weeçxya'mée. Miiyajkxwe, Dxus jxkaahna we'weni Sinaíjũwe'sxçxá's weeçxçxawa iyumeeta', aça' kwe'sxa' wejx iyuya' ājame'nja'w, cielujũ yuu we'weni's nwēese'jya' wa'lçxa'. <sup>26</sup> Dxus Sinaí thã'j vxixte we'weni' naa kiwe's kēese'kh. Nawa açxha' txã'wēçxáamée na'jī'k: Ki' peena thaakwe kēese'je'nja nawa kiweçxá'smée, petx cielu yā'jçxa kēese'je'nja jī'k. <sup>27</sup> Isa ew jiyute yu', ki' peena thaakwe kēese'je'nja jīçxa', Dxus vxitnisa ēsesa yu' jxuka ũsxitxna,

aça' ěsesaméeçxáa neeyũutxna jĩçxane' txã'jĩ'. <sup>28</sup> Nawa Dxus tasxte kwe'sx ũswa'j yu' kēese'jnimée yuuna. Txãa pa'ga Dxusa's weçxana neewe'wega, txajx dxi'pte ew yuuçxáa yũuna. <sup>29</sup> Txã'wēme', kwe'sx Dxusa' jxuka ivxiituwa'jsa' ipx na'wēsa.

## 13

### *Dxusa's na'wē weçxana fxi'zewa'ja'*

<sup>1</sup> Teeçxsa na'wēçxah puutx peeygãhna fxi'zewa'ja's peçxkananuwe. <sup>2</sup> I'kwe'sx yat-su pa'jsatx weçxana mpa'gawe. Txã'wē yũusa' maafia' angeleswe'sx yuhtxwa jiyunimeete jxpa'ga'ta.

<sup>3</sup> Preesu ũssatx peeygãhna mfxi'zewe, i'kwe'sx yuu preesu ũssa na'wē yajkxna. Pkxuuni fxi'zesatxwa peeygãhna mfxi'zewe, kwe'sxwa kakwe ji'ptha'w na' naa kiwete txã'wēy pkxuuni yuuwa'jsatha'w sũhna miijajkxwe.

<sup>4</sup> Kabaçxa fxi'zeni' wala yuh ewsa', txãa pa'ga kabamey yu' pkal yũunuwe. Sa' kabayã'jçxa', vxitesa yakh pkal yũuna fxi'zewa'jme'. Txã'wēme', Dxusa' kastigaĩna txã'wē pkal yũusatxi'.

<sup>5</sup> Vxyuçxá's yajkxna fxi'zewa'jme'. Ma'wēkuē ji'phuni yakhçxáawa wēt mfxi'zewe, txãa pa'gatey Dxus we'weçxa': Bagaçxte yuhwa i'kwe'sxçxáa yuutxi'sa' nvxihtme'nja jĩ'k. <sup>6</sup> Txãa pa'ga txãa yuuçxá's pi'kiga, kxtey pasyujuna sũhna na'jĩna:

Dxusa' kĩhtewa jxuka txãa yuuçxáak pu'çxhi',

Txãa pa'ga weh yuhwa ùukhme'nja naa kiwete nasa ewmée yūusatxi'.

<sup>7</sup> Dxus yuwe pta'sxsa i'kwe'sxtxi jxpe'jsatx miijajkxwe: Txãawe'sx ma'wē ne'ta Dxusa's yajkxna fxi'ze txã'wēy mfxi'zewe.

<sup>8</sup> Jesukristo' bagaçxte yuhwa yu'pthehsame'. Nyafxiiwa ma'wēsaga yu', sa' āçxwa txãaíçxá', sa' bagaçxtewa txãaíçxáa nes yuuwa'jsa'. <sup>9</sup> Txãa pa'ga i'kwe'sxa' fxiy kaapiya'jni's nwēese'jna fxi'zenuwe, wejxwa Dxus peeygãaniçxá's ũuste jxpa'gaçxa çxhãçxha fxi'zeni ewsa', aça' ũ'nisu jxkaahnisa' bagaçxte yuhwa selpiwa'jsame' txã'wēsatsx nwēese'jsawe'sxtxi's.

<sup>10</sup> I'kwe'sxa' ew miijajkxwe altal ji'ptha'w txã'sa'. Txãa altaltewe'sxa's ũ'we'çmeeta' kx-tee selpisaawe'sxa'. <sup>11</sup> Pkalsawe'sx ju'gu we'we pu'çxsa judiu' tajkx ikhnisa eea's Dxus yuuçxáa ũsni jñitek txajxa' jxūna u'jwe' jxukaysa pkaltxi peltunãyni yuukahn, nawa takx kakwe yuutxi'sa' txajū jxūna u'jçxa ekajutx kabu'. <sup>12</sup> Jesuswa txã'wēyku çxhab ekaju kasehçxa uuna ũsu', txajx eeju nasaa pkaltxi' jxuka peltunãyya'. <sup>13</sup> Txãa pa'ga kwe'sxwa Dxusna neewe'wena ũsni yat nyafxiiwe'sxa's nvxihtçxa, Jesus yakh fxi'zeya' kasejega, txãawa ma'wēga pxthaa yuu txã'wēy yaaçeni yuuya'. <sup>14</sup> Kwe'sxa' nyafxii ũsni yata's nvxihtçxa, çxhab bagaçxte yuhwa pçuwa'jsamée ũsna txã'sna pakwena ũstha'w, naa kiwete' bagaçxte yuhwa pçuwa'jsamée çxhab ji'phmeetha'w naa pa'ga. <sup>15</sup> Txãa pa'ga Dxusa's tuuthe'jna nes yuuwa'j ji'ptha'w Jesukristo's pi'kxçxa bagaçxtewa. Dxusa's

weçxana tajkx ikhçxa kabupkaçxte, kwe'sx ũusuh jxuka yajkxçxa txajx yase's kxsusna weçxana nes yuuwa'j ji'ptha'w. <sup>16</sup> Txã'wẽ yũusa' kĩhçxáawa i'kwe'sx ji'phuni's vxitesatx jtxxuhdena fxi'zewa'ja's peçkkananuwe, txãa pa'gatey txã'wẽ yũuni'sku Dxusa' weçxá'.

<sup>17</sup> Sa' i'kwe'sxtxi kaapiya'jna jxpe'jsatxi's kxtey yuuna mwẽese'jwe, txãa pa'gatey txãawe'sxa' i'kwe'sx ũustxi vxituwe'sxte thegsata'. Txãawe'sxa' cielute Dxus tasxte utxaaçxa pta'sxwa'j ji'phta', txãasatx txã'wẽ yũ'. Aça' txãawe'sx mjĩini's weeçxsa na'wẽ yuunuwe, ewçxáa yũuwa'ja's mpa'pçxuwe. Txã'wẽ yũumeete', txãawe'sx mjĩini' i'kwe'sxtxi's kĩhte yuhwa selpiimeena.

<sup>18</sup> Kĩhtewa ewçxáa fxi'ze wẽeçxa bagaçxte yuhwa pkalte yu' fxi'zesameetha'w, naa pa'ga kwe'sx pa'gate Dxus yakh mpuutxwe'wewe.

<sup>19</sup> I'kwe'sxtxi's Dxus yakh puutx we'we jxpi'ki'th, kxah Dxusa' adxa's txaçxmeyna ki' kaasxwedu'juna i'kwe'sx yakh ũsya'.

### *Yuwe weçxaa kaahni*

<sup>20</sup> Jesukristo' iiméh ew txajx nasatx jxpe'jsa yu'k, txajx eek txã'wẽ u'se puutx we'weni bagaçxte yuhwa yu'pthehwa'jme's vxitçxa nvxi-itni's kxtey kxũ'ju'jwa'jsa yuu. <sup>21</sup> Sa' Jesukristo uutewa ki' itxi vxit-sa Dxusa' i'kwe'sxtxi's kĩhte yuhwa peejxmée ewçxáa kaafxize'jena, txajx jxthãasni's kxtey yuukahn. Sa' txã'wẽ i'kwe'sxtxi ma'wẽ yuuweçxtewa kxtey yuuna, Jesukristo pu'çxte txajx dxi'pte ew yũusa yu's. Jesukristo yuuçxáa bagaçxtewa jxtuhthesa yuuna.

<sup>22</sup> Yakhthē'jwe'sxtxi neewe'we'th, wa'lmée jxpa'gakahn maz yuwe jxu'jmeekuẽ yu'kxpehna fxi'jni's. <sup>23</sup> Sa' pta'sxiçthu kwe'sx yakhthē'j Timoteo' karceluh txhweteni yã'j ũsa', sa' dud wáa pa'jana, aç'a' pe'jçxa yuwe'nja i'kwe'sxtxi puutx uyya' yuhçxa'.

<sup>24</sup> Dxuus yatte i'kwe'sxtxi jxpe'jsawe'sxtxi' jxukaysatx yuwe meen weçxawe, sa' Dxus yakh fxi'zesawe'sxtxiwa txã'wêy. Italiajũwe'sxwa yuwe weçxaa kaja'tx.

<sup>25</sup> I'kwe'sx jxukaysatx Dxusa' pu'çxna nes yu-una.



**Dyus Yuwe U'sesa**  
**Páez: Dyus Yuwe U'sesa New Testament**

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

06da09f4-8d0f-5001-ae8c-0e6aa0131ffd